

Zrinjski u produžecima bolji od Utrechta i plasirao se u 3. pretkolo Liga Evrope



Fudbaleri mostarskog Zrinjskog plasirali su se u 3. kolo kvalifikacija Evropske lige, nakon što su u Mostaru poslije produžetaka savladali Utrecht rezultatom 2:1. Nakon regularnog dijela utakmice, baš kao i u prvom susretu u Holandiji bilo je 1:1.



Ovo je najveći uspjeh mostarskog kluba u evropskim takmičenjima, a treba reći da je pobjeda zaslužena, tim više što su jedini gol primili vrlo nesretno i nespretnošću golmana Brkića.

U posljednjoj minuti prvog poluvremena dosuđen je sumnjiv prekršaj za Utrecht sa vrha šesnaesterca. Gustafson je uzeo loptu i šutirao po sredini, ali Brkić je vrlo slabo reagovao i lopta je prošla kroz noge i ušla u mrežu za 0:1. Bio je to šok za Mostarce, koji su i pored dobre igre u prvom dijelu, u nastavku morali juriti rezultat.

Mostarski tim je potpuno zaslužen izjednačio u 66. minuti. Bila je to sjajna akcija po desnoj stani. Mandić je ostavio loptu za Kadušića koji je centirao, a u maniru rasnih strijelaca Hadžić je postigao izvanredan gol udarcem iz prve za 1:1 i erupciju oduševljenja Pod Bijelim brijegom.

Do kraja regularnog dijela utakmice nije bilo pravih šansi, iako su obje ekipe imale nekoliko solidnih napada. Ostalo je 1:1, a s obzirom da je i prvi meč tako završio, ušlo se u produžetke.

Iz prvog produžetka vrijedilo je izdvojiti šansu za goste u 96. minuti. Gustafson je fenomenalno izveo slobodan udarac sa 25 metara, ali Brkić je panterском intervencijom izvadio loptu ispod prečke i iskupio se za primljeni gol.

U 111. minuti nakon jednog pasa Šovšića, slabo je reagovala odbrana gostiju na čelu sa golmanom Jensenom. Prvo je lopta nakon intervencije jednog odbrambenog igrača Utrechta pogodila preečku, nakon čega je Jensen kratko uhvatio, ali ispala mu je iz ruku ravno na nogu Mandića koji je iz blizine poslao u mrežu za 2:1.

Do kraja Utrecht nije imao snage da dođe do poravnjanja, pa je Zrinjski slavio sa 2:1 i prošao je u 3. kolo kvalifikacija Evropske lige gdje će igrati protiv švedskog Malmea. (Sc, tl)

Date: 01-08-2019